

Dios Rutta Noemitapas yanapaskamanta

La historia bíblica de Rut



Napo Kichwa

Dios Rutta Noemitapas yanapaskamanta

La historia bíblica de Rut



Las ilustraciones son propiedad de
© 1978 David C. Cook Publishing Co.,
y son usadas con el permiso correspondiente.

Dios Rutta Noemitapas yanapaskamanta
La historia bíblica de Rut

© Wycliffe Bible Translators, Inc.

Primera edición, 2016
500 ejemplares

Hecho el Depósito Legal
en la Biblioteca Nacional del Perú
No 2016-04745

Impreso por
IMPRENTA GRÁFICA “ONCE ESTRELLAS”
De: Wender Sinarahua Lopez
Pasaje Breña No 11 – San Antonio – IQUITOS

Publicado por
La Liga Bíblica del Perú
Jr. Huaraz 2030 (CONEP), Pueblo Libre. Lima.




© 1996 David C. Cook

Shu Israel ayllu Moab llaktama risa imasna pasaskamanta

Rut 1.1-19a, 22b; Deut. 25.5-6

Kay kwintaskakuna kanakun ñukanchi Israel llaktapi manara apukuna tiyaska urasmanta. Chay uras shu pasaylla yarkay tiyarka. Mana ima mikuna tiyapi shu ayllu ñukanchi Israel llaktamanta Moab llaktama rirka. Israel llakta Belenmanta ayllu kanakurka. Chay ayllu karipa shuti Elimelec karka.

Elimelec paypa warmi Noeminti, ishkay churikunaynti
Moab llaktama kawsankapa rinakurka.



© 1996 David C. Cook



© 1996 David C. Cook

Manara unayta chay llaktapi kawsaraskapi Elimelec
wañurka. Paypa warmi Noemi sapalla churikunawa sakirirka.

Noemipa churikuna Moab warmikunawa kasaranakurka.
Shu Orfa, shuka Rut shutiyu karka.



© 1996 David C. Cook



© 1996 David C. Cook

Noemi chunka watata Moab llaktapi kawsaraskapi paypa
churikuna wañunakurka.



© 1996 David C. Cook

**Noemi shu paypa kachuwa Israel llaktama kawsankapa
rinakuskamanta**

Rut 1.6-18; Deut. 25.5-6

Noemi Moab llaktapi kawsaraskapi shuk puncha Dios Israel ayllukunata yanapaskata yacharka. Dios yanapapi tarpukuna achka mikuna muyu wayukuna aparinakuskata Noemi yacharka. Chayta yachasa Noemi paypa kachukunawa rinkapa alicharinakurka Noemi ñupa kawsaska Israel llaktama kawsakrinkapa. Alichariskawasha rinakurka. Manara karuta riskapi Noemi paypa kachukunata rimarka:

—Kutillata kawsakrichi kankunapa ayllukunapama.
Imasna kankuna ñukata yanapawarkankichi, ñuka

churikunatapas, chasnallata Dios kankunata yanapachu. Dios kankunata yanapachu mushumanta kariyankapa— nisa.

Noemi kachukuna rinkapa —samashu— nisa kachukunata mucharka. Ranti kachukuna mana sakirinayasa wakankapa kallarinakurka.

—Kanmanta mana hichurinayanchichu— nisa rimanakurka. —Saki ñukanchipas kanwa kanpa ayllukunapama rinkapa, parihu kawsankapa.—

Noemi rimarka:

—Richi llakiska kachukunalla. Yankamanta katinayawankichi.—

Noemi ñupa Dios Moiesta killkachiska kasna niskata riksirka:

Ishkay wawkikuna chay wasillapita kawsakuna tiyanma. Shu paykunamanta, warmiyu kaska, wawa illami wañunmachari. Chay wakcha warmi kuti kariyanata munasaka paypa kari wañupa aylluwa kariyana kan. Mana kariyana kanchu maykan kariwapas. Chasna kasa kari wañupa wawki chay wakcha warmiwa warmiyana kan. Chay warmipa punta churi chay warmipa kari wañupa wawashinami kanka. Chay wawa mamapa kari wañupa shutita churay tukunka chay wañuska runa mana miray illa sakirinkapa nisa killkariskata Noemika riksirka.

Kari wañupi wakchayaska warmi kari wañupa kikin ayllullawa kasarana kaskata yuyarisa kachukunata rimasa katirka:

—Ña mana charinichu shu churikunata kankuna paykunawa kariyankapa. Ñuka kutillata kariyankapa awlami kani. Chasna kapipas kunashitulla kariyasa wawata tupasapas wiñankapa unayankami. Kankuna mana ushankichimachu chay churikuna wiñanakama paykunawa kariyanata chapankapa. Nima kari illa sakirinata munankichimachu. Llakiska kachukunalla, mana alichu kankuna chasna ñakarisa kawsankapa. Ñuka shuti kankuna ñakarinamanta yalita ñakarihuni Dios ñukawa piñariskarayku— nisa Noemi rimarka.



© 1996 David C. Cook

Chayta uyasa Noemipa kachukuna yapa llakirisa kuti
sinchita wakankapa kallarinakurka. Chasnapi Orfa paypa
kari mamata ña —samashu— nisa sakisa rirka. Ranti Rut kari
mamawa sakirirka. Chasnapi Noemi Rutta rimarka:

—Kanpa kachuka ña paypa llaktamallata kawsankapa
riranmi. Kuti yanka dioskunata kushiyachisa kawsankapa
riran. Kanpas paywa parihu ri— nisa.

Ranti Rut rimarka:

—Ama rimawaychu kanmanta sakirinkapa.

Kan maymapas ripi chaymallatami risha.

Kanpa llakta ñuka llaktami kanka.

Kan kushiyachiska Dios

ñuka kushiyachiska Diosmi kanka.

Maypipas kan wañunki chayllapita

ñukapas wañushami.

Kan wañupi rumi hutkupi churay tukuskallapita

ñukapas wañusa churay tukushami.

Ñuka kanta sakipi Dios ñakachiwachu.

Kan wañupipas chayllapi kasha rurana

kaskata kanrayku rankapa— nisa Rut rimarka.

Chayta uyasa Noemi mana kuti rimarkachu. Ña
yacharka paypa kachu Rut shuti paywa rinata munaskata.



© 1996 David C. Cook

Chasna kapi parihu purisa purisa rinakurka Belen
llaktama paktanakama. Belenma paktaskapi arusshina
muyuya cebadata pallana uras karka.

Rut Boozpa chakrapi trabahaskamanta

Lev. 23.22; Deut. 24.19; Rut 2.1-23

Ñupa urasmanta Dios Moisesta killkachiska tyan. Chay killkariskapi chakra amuta kasna riman:

Kanpa chakrapi cebada trigu pallana uras mana kuchunkichu chakra mayata wiñara wankukunata. Nima pallaraskapi makimanta llushpirisa urmaska wankukunata ama tantachinkichu, chayllapi sakinki. Mana imayukunapata sakinki, shuk llaktamanta mitikuska chaski tukuska runakunapatapas. Kanpa chakrapi tulluynti pitiska cebada trigu wankukuna watariskakunata tantachiraskapi shu shu wanku watariskata kunkarinkima chari. Chasna kapi ama kuti chakrama apankapa rinki. Chayllapi sakinki mana imayu runakuna apankapa. Shu llaktamanta mitikusa chaski tukuska kawsarakuna, yayata mamata mana charikuna, wakcha warmikunapas apanakuchu. Kan chasna rasa kawsapi kanpa amu Dios kanta yanapankami. Tukuy kan ruraska ali kanka nisa chay killkariskapi riman.



© 1996 David C. Cook

Shuk punchakuna Noemi paypa kachu Moab warmi
Rutwa Belen llaktapi paktanakuskawasha Rut chay killka-
riskata riksisa Noemita rimarka:

—Chakrakunama rinkapa sakiway cebada muyu
wankushtukunata tantachinkapa. Pallakama runakuna
sakiwanakunkachari paykunata katisa urmaska wankukunata
hapisa tantachinkapa.—

Noemi rimarka:

—Alimi, ñuka llakiska kachulla, ushanki rinata.—



© 1996 David C. Cook

Chasna rimapi Rut rirka. Shu chakrama paktasa
 trabahakamakunapa makimanta urmaskata hapisa
 tantachinkapa kallarirka. Mana yachasa Rut paypa alipa
 trabahankapa Boozpa chakrapi paktarka.



© 1996 David C. Cook



© 1996 David C. Cook

Chay chakra amu Booz Rutpa kari wañupa yaya
Elimelec wañupa ayllu karka. Ayllu Booz yapa kullkiyu karka.
Belenpi kawsa runakunapa yapa balichiska runa karka. Mana
karan puncha chakrama puri kasapas Booz rirka Rut Boozpa
chakrapi trabaharaska puncha. Belen llaktamanta llukshisa
paypa chakrama rirka trabaha runakunata rikunkapa.

Chakrama paktasa trabaha runakunata —ali puncha— nisa
rimarka —Dios kankunata yanapachu.—

Trabaha runakuna kutipasa rimanakurka:

—Kantapas Dios yanapachu— nisa.

Booz chaypi mana riksiska warmita rikusa trabaha
runakunata rikukamata tapurka:

—Pita kan chay shipas warmi.—



© 1996 David C. Cook

Chay rikukama kutiparka:

—Moab llaktamanta Noemiwa shamuska warmimi
kan. Chay warmi mañawarka: —Cebada wankukunata
tantachinkapa sakiway. Trabahakamakunata katisa
llushpiriska wankukunata tantachinkapa sakiway— nisa.
Tutamanta paktamuska urasmanta yapa sinchita trabaharka.
Kunalla tampupi ansata samaran— nisa rikukama rimarka.

Chayta uyasa Booz Rutta kayarka. Shamupi rimarka:



© 1996 David C. Cook

—Alita uyanki ñuka rimaskata: Shupa chakramanta wankukunata ama tantachikrinkichu. Kayllapi sakirinki. Ñukapa trabahakama warmikunata katisa wankukunata tantachinki. Alita rikunki maytami rinakun, chayllata katinki. Ñukarayku trabaha runakunata kamachirkani kanta mana killachinkapa. Kan upyanayasaka paykuna yakuta huntachiskakunamanta upyanki.—

Chasna rimapi Rut Boozta yapa balichiskata rikuchisa allpakama kumurirka. Washa Boozta tapurka:

—Ima yuyaywata chasna yapa alita rurawanki. Ñuka mana kay llaktamanta kapipas imarayku ñukamanta yapa yuyarinki.—

Booz kutipasa rimarka:

—Ña kwintawanakurkami kan imana kanpa kari wañuskawasha paypa mamawa alita kawsarkanki. Kanpa aylluta, kanpa llaktata sakisa kay allpama ñukanchiwa kawsankapa shamurkanki, kan mana riksiska runakunawa. Alita raskamanta Dios kanta yanapachu. Ñukanchi Israel runakuna mañaraska Dios kanta alita rachu. Paymanta yanapay tukunkapa ñukanchi Israel runakuna mañaraska Dioswa sinchikuskanki.—

Chasna Booz rimapi Rut rimarka:

—Achka pakrachu, Señor. Kan ñukawa yapa ali kaskarayku alita yuyachiwanki. Kanta yanapasa kawsa

warmikunamanta yali ñuka mana bali kapipas alita
yuyachiwaskanki.—



© 1996 David C. Cook

Washa Rut kuti trabahankapa riska. Mikuna uras Booz
kuti Rutta kayarka:

—Kayma miku shamuy. Mikuna tyan. Mikuy. Kallanapi
mishki akrunaya churaskapi panta hukuchisa miku shamuy.—

Chasna rimay tukusa Rut palla runakunawa parihi
mikunkapa tiyari shamurka. Booz payta kusaska cebada

muyukunata mikunkapa kurka. Chaypi saksakta mikurka.
Mikuna puchuskata wakachirka paypa kari mamapama
apankapa. Rut kuti wankukuna urmaskata tantachinkapa
rirka. Chasnapi Booz trabaha runakunata rimarka:



© 1996 David C. Cook

—Chay warmi wankukuna urmaskata hapisa
tantachinkapa sakinkichi, tulluynti pitisa wankura
mayashtupipas. Kankuna makipi hapiriska maykan

wankukunatapas allpama urmachichi chay warmi tantachinkapa. Ama payta killachinkichichu— nisa trabahakunata rimarka.

Rut wankukunata tantachisa katirka tutayanashitukama. Chaypawasha wankukunamanta muyukunata ishkusa ishkay chunka yali llashata tantachirka. Chay puncha cebadata tantachiskata markasa Belen llaktama apasa rirka. Paypa kari mama Noemi tukuy paypa kachu tantachiskakunata rikusa kushiyarka. Rut mikuna puchuskatapas paypa kari mamata kurka. Chasnapi Noemi kachuta tapurka:



© 1996 David C. Cook

—Maypita kuna trabaharkanki. Imanata usharkanki chasna achka cebadata tantachinkapa. Dios chay chakra amuta achkata yanapachu kanta yanapaskarayku.—

Rut kutiparka:

—Booz shutiyu runapa chakrapi trabaharkani.—

Chayta uyasa Noemi rimarka:

—Dios payta yanapachu. Chay runa ñukanchiwa yapa ali kan. Ñukanchi ayllu wañukunata yuyan. Ñuka kari wañupa ayllumi kan. Chasna kasa Booz ñukanchita yanapana kan. Mana Booz yanapapika ñuka kari wañupa shu ayllu ñukanchita yanapakama tukuna kan. Dios ñupa uras killkachiskashina wañuskapa ayllu rurana kaskata chay ayllukunamanta shu ayllu paktachina kan.—

Chayta uyasa Rut yalichisa rimarka:

—Boozmi rimawarka payrayku trabaha warmikunawa sakirinkapa cebada pallanata tukuchinakama.—

Chasnapi Noemi rimarka:

—Alimi kachulla, Boozpa chakrapi trabahankapa sakiri. Ama karuyankichu chay trabaha runakunamanta. Mana pi kanta killachinkapa.—

Washa Rut Boozpa chakrakunapi pallana warmikunata katisa urmaska wankukunata tantachisa trabaharka cebadata trigutapas pallana tukurinakama. Paypa kari wañupa mamawa kawsasa katirka.

**Rut Boozpa cebada muyukunata
wakachinama riskamanta**

Rut 3.1-18; Lev. 25.25-30

Shu puncha Noemi paypa kachu Rutwa kwintarirka kasna nisa:

—Llakiska kachulla, ñuka maskana kani kanpa kari tukunata. Munani kan kikin wasita charisa kushilla kawsankapa. Kanta Boozmanta rimaskata yuyarinkichu, ñuka kari wañupa ayllu kaskata. Paypa chakrapi pallahuskapi Boozta yanapasa kawsa runakunata katisa urmaska wankukunata tantachirkanki. Alita uyanki ñuka rimankapa rahuskata: Booz kuna tuta paypa ishkuna pampapi kanka. Ishkusa muyukunamanta cebada hansita wayrachisa hichunkapa rahun. Sumakta armakrinki. Suma asna yakuwa hawirinki. Ali mushu churarinata churarinki. Chasna Booz ishkusa trabaharaska pampama rinki. Kuyrarinki Booz kanta mana rikunkapa pay mikusa upyasa tukuchinakama. Alita rikunki maypimi puñunkapa siririnka. Booz ña puñuskapi alimanta risa katanata chaki partipi patachinki Boozpa chaki chushapi sakirinkapa. Kanka paypa chaki mayapi siririnki. Chasna kan rapi Booz kawsarisa yachanka kan mañaraskata kanta yanapakama tukunkapa. Payllata kanta rimanka imata rurana kaskata.—



© 1996 David C. Cook

Chayta uyasa Rut rimarka:

—Tukuy kan rimaskashina rurashami.—

Rut Boozpa ishkuna pampama risa Noemi rimaskashinallata rurarka. Booz mikunata upyanata tukuchiskawasha yapa kushi rirka cebada muyukuna tantachiska mayapi siririnkapa. Puñuskapi alimanta risa Boozpa katanata chaki partimanta patachisa Rut chaki mayapi siririrka. Chupi tuta kunkaymanta kawsarisa muyurisa Booz shu runawa tuparirka. Mana yacharkachu pi kaskata. Chasnapi tapurka:

—Pita kanki— nisa.

—Rutmi kani— nirka, —kanta yapa balichi warmimi. Kanka ñuka kari wañupa yaya wañumanta ayllumi kanki.

Chasna kasa Dios ñupa uras killkachiskata paktachisa ñuka kanpa ayllupa wakcha warmita yanapana kanki. Chayrayku munani kan ñuka kari tukunkapa.—

—Dios kanta yanapachu shipashtulla— Booz rimarka. —Kanpa kari wañuta yuyarisa paypa mamawa sakirisa kan yapa ali kaskata rikuchiskanki. Kuna ñukata maskaskawa, kanpa kari wañupa aylluta, paypa ayllullawa sakirinayasa kan yali ali kaskata rikuchinki. Kariyanayasaka maskankima karka ñukamanta yali malta karita. Ranti ñukata munawanki kanpa kari tukunkapa. Ama manchankichu Rut, tukuy Belen llaktapi kawsa runakuna yachanakun kan ali warmi kaskata. Chayrayku tukuy kan mañaskata rurashami. Shuti, kanpa kari wañupa ayllumi kani. Chasna kasa kankunata yanapakama tukuna kani. Ranti kanpa kari wañu charin yali kikin aylluta ñukamanta kankunata yanapakama tukunkapa. Chasna kapi kunaka kasilla puñunki. Ranti kaya yacharinka kanpa kari wañupa ñukanchi ish kay ayllumanta yali kikin ayllu yanapanata munankachu manachu munan. Chay ayllu yanapanata munapi nima rimana ñukawa tiyankachu. Diospa ñupapi kanta rimani chay ayllu mana munapika kanpa kari wañupa ayllu paktachina kaskata ñuka rurashami, ñuka kankunata yanapakama tukushami.



© 1996 David C. Cook

Kunaka alita puñuy.—

Rut Boozpa chaki mayallapi sakirisa puñurka. Manara
puñupi Booz rimaska karka: —Mana pi yachachu shu warmi
ñuka muyukunata wakachinama puñu shamuskata— nisa.



Chasna kapi manara pakariskapi Rut hatarirka. Chayra manara riskapi Boozpas hatarisa Rutta rimarka:

—Kanpa hawa churarinata surkusa allpapi mantay.—

Rut mantapi Booz chaypi cebada muyukunata talisa kurka, chusku chunka yali llashata. Chay churarinata watasa Rutpa rikra mukupi markachiskawasha Booz Belen llaktama rirka. Ranti Rut paypa kari wañu mamapa wasima rirka.

Rut kuti wasima paktaskapi Noemi tapurka:

—Imanata karkanki, ñuka kachulla.—

Rut paypa kari wañupa mamata kwintarka tukuy Booz raskamanta kwintaskamantapas. Kuti shu shimita yalichisa rimarka:

—Booz tukuy kay cebada muyukunata kuwarka: —
Kanpa kari mamapa wasima mana chasnalla rina kanki—
nisa.—

Chasnapi Noemi Rutta rimarka:

—Kunaka mana ukuparisa chapana kanchi.
Ñuka ña yachani Booz mana samankachu yuyaraskata
alichinakama.—

Booz Rutwa warmiyaskamanta

Lev. 25.25; Rut 4.1-17

Dios ñupa uras Moisesta killkachiskapi riman:

Maykan Israel runa mana imayu tukusa allpata rantichina kapika, paypa yali kikin ayllu chay allpata rantina kan paypa ayllupa sakirinkapa nisa. Noemi chasna mana imayu tukusa paypa allpata rantichina kaska.

Chayta yachasa Moises ñupa uras killkaskata yuyarisa Booz ayllukunawa chay allpata rantinamanta kwintarinkapa llakta yaykuna punkuma rirka. Punku mayapi tiyarirka. Chaypi runakuna munturi kanakurka parihu yuyarinkapa. Booz chaypi tiyaraskapi Noemipa kari wañu Elimelecpa shu ayllu pasararka. Chay ayllu Noemipa kari wañupa yali kikin ayllu kasa Boozmanta ñupa Noemita Ruttapas yanapana kaskata paktachina karka. Booz chay ayllu pasaraskata rikusa kaparisa kayarka:

—Kayma shamuy— nisa.

Shamupi —Tiyari— nirka. —Kanwa ansa kwintarinata charini.—

Chasna kayay tukusa Boozpa mayapi tiyarirka.



© 1996 David C. Cook

Chay urallata Booz chunka yali balichiska Belenpi
kawsa runakunata kayarka paywa parihu tiyarinkapa. Kayapi
tiyari shamunakurka.



© 1996 David C. Cook

Paykuna uyaraskapi Booz paypa aylluta rimarka:

—Kunashtulla Noemi Moab llaktamanta kuti kaypi kawsankapa paktamurka. Rantichinayan ñukanchi ayllu wañu Elimelecpa allpata. Elimelec wañupa ñukanchi ishkay ayllumanta kan yali kikin ayllu kapi Noemi chay allpata rantichinata munaskata kanta rimani. Chayta kan yachankapa munani ñukamanta ñupa kaskarayku chay allpata rantinkapa.

Kanta kamachini: Chay allpata ranti ñukanchi ayllupa allpa sakirinkapa. Kaypi ñukanchiwa munturiskakunapa ñupapi rimaway rantinayankichu manachu. Ñukanchi ishkaylla kanchi Elimelec wañupa ayllu. Ñukanchimanta shu ayllu mana tiyanchu chay allpata rantinkapa. Kan ñukanchi ishkaymanta yali kikin ayllu kasa munankichu manachu munanki paktachina kaskata rurankapa. Kan mana munasaka rimaway ñuka chay allpata rantinkapa kanmantawasha ñuka yali kikin ayllu kaskarayku.—

Boozpa ayllu rimarka:

—Ari, rantishami.—

Chasnapi Booz rimarka:

—Ansa yuyarina chayra tyan. Kan chay allpata rantisaka wakcha warmi Rutwa warmiyana kanki. Rut Noemiwa Moab llaktamanta shamuska wakcha warmimi kan. Chay warmiwa kan sakirisa kankunapa punta churi wawa chay wakcha warmipa kari wañupa wawashina kanka chay wañuskapa miray mana tukurinkapa. Kan rantina allpaka chay wawapa sakirinka.—

—Chasna kapika ña mana rantishachu— Boozpa ayllu rimarka. —Chayta rantisaka yanka ñuka kullkita tukuchisha. Kuti shu wawata tupapi ñuka kikin churikuna yali ansallawa sakirinakunka ñuka wañuskawasha. Chasna kapi mana rantinata ushanichu. Kan munasaka kanllata ranti. Ñuka alimi rimaskanki kan rantinata ushankapa.—

Ñukanchi ñupa uras kawsa Israel ayllukuna chay uras ranata yachariskashina chay Boozpa ayllu chakipi churariskata surkusa Boozta rikuchisa —hapi— nisa rimarka. Chasna kunayaraskapi rimarka:

—Kayta kanma kuskawa rikuchini ñukalla rantina ushaskata kan rantinkapa sakini.—

Chay paypa ayllu chakipi churariska kaskata hapisa paktaska uras kayaska balichiska runakunata shu chaypi kaskakunatapas Booz rimarka:

—Kunaka kankuna rikukuna uyakuna kankichi ñuka Noemipa kari wañu Elimelecpa, churikunapapas tukuy chariskakunata rantinkapa niskata. Chasnallata Moab llaktamanta wakcha warmi Rutwa ñuka warmiyasha nisa rimaskata kankuna uyakuna kankichi. Ñuka Rutwa punta churi wawata tupapi Rutpa kari wañupa wawashina kanka miray illa mana sakirinkapa. Rutpa kari wañupa allpawa sakirinka. Chasna kasa chay kari wañupa ayllu mirasa mirasa kawsanka Belen llaktapi. Tukuy chay ñuka rimaskata uyakuna kankichi. Ñuka mana paktachipi hawachisa kastigawankichi.—

Chaypi kaska runakuna rimanakurka:

—Ñukanchi kankuna raskata rikukuna kanchi, kankuna rimaskata uyakunapas. Dios kanpa warmi tukunata yanapachu ñukanchi Israel runakunapa ñupa kawsa ayllu punta mirachi warmikuna Raquelshina, Leashina kankapa. Kan chay shipaswa warmiyasa kankunapa miraykuna Israel

llaktapi yapa balichiska ayllu tukunkapa Dios yanapachu.
Kanpa ñupa kawsa awlu Judamanta Tamarpa churi Farespa
ayllu balichiskashina kanpa ayllu balichiska kachu. Efratas
miraska ayllu bulakunamanta kanpa ayllumanta miray
yali balichiska tukuchu Belen llaktapi. Tukuy imakunata
chari tukuchu. Tukuy Belenpi kawsa runakuna kankunata
riksinakuchu.—



© 1996 David C. Cook

Chasna kwintanakuskawasha Booz mana unayasa
Rutwa warmiyarka. Paypa wasima pusharka. Dios Rutta
yanaparka chichu tukunkapa. Shu churi wawata tuparka.



© 1996 David C. Cook

Rut wawata tupapi Belen llaktamanta warmikuna Noemita
rimanakurka:

—Pakrachushunchi Dios Yayata. Kanta yanaparka shu
nitw wawata tupankapa kanta yanapa kankapa. Dios chay

wawata yanapachu wiñasa tukuymanta Israel llaktapi riksi tukuska kankapa. Wiñasa chay wawa kanta kushiyachinka. Kan awla tukupi kanpa kachu Rutpa churi wiñasa kanta yanapasa kawsanka. Kanpa kachu kanchis churikunamanta yali balin. Kanta yapa llaki kan— nisa rimanakurka.



© 1996 David C. Cook

Rutpa churi Obed niskata shutichinakurka. Obed wiñasa Isaipa yaya karka. Washa Isai hatun apu Davidpa yaya karka.

